



REPUBLIKA E SHQIPËRISË

KUVENDI

PROJEKT

LIGJ

Nr. _____, datë _____._____.2016

**Për
Sigurinë në punë, emergjencat dhe shpëtimin, në veprimtarinë minerare dhe në ndërtimin
e punimeve nëntokësore në veprat hidroenergjetike**

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

K U V E N D I

I REPUBLIKËS SË SHQIPËRISË

V E N D O S I:

KREU I

DISPOZITA TË PËRGJITHSHME

Neni 1

Objekti

Objekti i këtij ligji është përcaktimi i parimeve të përgjithshme që rregullojnë sigurinë në punë, emergjencat dhe shpëtimin, në veprimtarinë minerare dhe në ndërtimin e punimeve nëntokësore të veprave hidroenergjetike.

Neni 2

Qëllimi

Ky ligj ka për qëllim të garantojë sigurinë e jetës dhe mbrojtjen e shëndetit të punonjësve dhe personave të tjerë që kryejnë punë në veprimtarinë minerare dhe ndërtimin e punimeve nëntokësore të veprave hidroenergjetike.

Neni 3

Përkufizime

Në këtë ligj termat e mëposhtëm kanë këto kuptime:

- 1."Emergjencë " - Është situata e pazakontë që sjell prishjen e regjimit normal të punës në minierë apo punime nëntokësore të veprave hidroenergjetike, e shkaktuar nga faktorë natyrorë (gjeologo-minerarë), teknologjikë apo njerëzorë, shoqëruar me avari, aksidente, rreziqe për jetën e njerëzve apo dëme materiale.
2. "Shpëtim" - Operacion i organizuar e i drejtuar me burime njerëzore e materiale për ndërhyrjen në përballimin dhe ndalimin e emergjencës.
- 3."Shpëtues" - Punonjës i kualifikuar i specializuar dhe i trajnuar për ndërhyrje në përballim dhe ndalimin e emergjencave dhe operacione shpëtimi nëntoke.
4. "Inspektor" - Punonjës i kualifikuar i AKSEM me eksperiencë profesionale që ushtron kontroll në zbatimin e kërkesave ligjore e teknike për sigurinë në punë ne veprimtarinë minerare dhe në ndërtimin e punimeve nëntokësore në veprat hidroenergjetike.
5. "Subjekt" - Person juridik ose fizik që zotëron leje minerare, marrëveshje kontraktuese për punë në miniera apo ndërtimin e punimeve nëntokësore të veprave hidroenergjetike.
6. "Autoriteti Kombëtar për Sigurinë dhe Emergjencat në Miniera" (AKSEM) - Autoriteti shtetëror kompetent për inspektimin e sigurisë, vlerësimin e rreziqeve, përcaktimin e masave parandaluese, vendosjen e sanksioneve dhe ndërhyrjen për përballimin e emergjencës dhe shpëtimin në veprimtarinë minerare dhe punimeve nëntokësore të veprave hidroenergjetike.
7. "Punime nëntokësore në veprat hidroenergjetike" - Tunele, puse, kanale, xhepa që ndërtohen ose hapen nëntokë nga subjekti që kryen veprimtari për ndërtimin e veprave hidroenergjetike.
8. "Veprimtari minerare" janë veprimtaritë e kërkimit, të zbulimit, të shfrytëzimit, të përpunimit, të mbylljes, të konservimit dhe të rehabilitimit të mjedisit minerar.
9. "Vepra hidroenergjetike" janë vepra të ndërtuara në përputhje me legjislacionin në fuqi, të cilat me anë të proceseve shndërruese, shfrytëzojnë potencialin e rëniës së ujit për prodhimin e energjisë elektrike.
10. "Ministri" - Ministri përgjegjës për veprimtarinë minerare.

Neni 4

Fusha e zbatimit

Dispozitat e këtij ligji janë të detyrueshme për t'u zbatuar nga:

1. Institucionet qendrore shtetërore që përcaktojnë me anë të akteve nënligjore procedurat për realizimin dhe mbrojtjen e sigursisë dhe shëndetit të punonjësve.
2. Subjektet publike e private, vendase ose të huaja që administrojnë, kryejnë punë në veprimtarinë minerare, punimet nëntokësore të veprave hidroenergjetike.
3. Subjektet publike e private, vendase ose të huaja që kryejnë e miratojnë studime, përgatisin dhe zbatojnë projekte teknike, hartojnë e miratojnë programe e planizim të zhvillimit të punimeve në veprimtarinë minerare dhe punime nëntokësore në vepra hidroenergjetike.
4. Autoriteti shtetëror kompetent për inspektimin e sigursisë në punë në veprimtarinë minerare dhe nëntokësore hidroenergjetike, vlerësimin e rreziqeve dhe ndërhyrjeve në emergjenca e shpëtim.

KREU II

KËRKESA DHE DETYRIME PËR SIGURINË NË PUNË, EMERGJENCAT DHE SHPËTIMIN

Neni 5

Kërkesat e sigursisë në punë

1. Të gjitha subjektet, që kryejnë veprimtari në minera dhe në ndërtimin e punimeve nëntokësore në veprat hidroenergjetike, si dhe studime ose projekte në këto fusha, janë të detyruara të zbatojnë kërkesat e sigursisë në punë në veprimtarinë minerare dhe nëntokësore hidroenergjetike, emergjencave dhe shpëtim.
2. Kërkesat e sigursisë në punë dhe veprimtarinë nëntokësore hidroenergjetike, emergjencave dhe shpëtimit hartohen nga Ministri në bashkëpunim me AKSEM dhe miratohen me Vendim të Këshillit të Ministrave.

Neni 6

Detyrimet e subjekteve

1. Çdo subjekt që zotëron një leje minerare, që kontraktin një shërbim të specializuar mbi një të drejtë minerare dhe ato që kanë marrëveshje kontraktore për ndërtim të punimeve nëntokësore të veprave hidroenergjetike, para fillimit të veprimtarisë, regjistrohen në AKSEM.
2. Subjektet në momentin e regjistrimit të tyre në AKSEM, deklarojnë personat përgjegjës të ngarkuar me drejtimin administrativ, drejtimin teknik dhe problemet e sigursisë në punë, si dhe informojnë jo më vonë se 5 ditë për çdo ndryshim të këtij personeli.

3. Çdo vend pune, objekt, instalim dhe impjant që vihet në funksionim dhe që ka punonjës që kryejnë punë, duhet të jetë i projektuar dhe nën kontrollin e mbikqyrjen e një personi përgjegjës.
4. Subjektet njoftojnë menjëherë AKSEM për çdo rast aksidenti me rrezik ose humbje jete, si dhe për raste të emergjencave serioze që kërkojnë ndërhyrjen e trupës së emergjencave dhe shpëtimit, si dhe kqyrjen e vendit të ngjarjes nga ky institucion.
5. Çdo subjekt minerar apo ndërtues i punimeve nëntokësore të veprave hidroenergjetike me palët nënkontraktore, përcakton me marrëveshje të firmosur përgjegjësitë për zbatimin e kërkesave ligjore për sigurinë e jetës dhe mbrojtjen e shëndetit në punë të punonjësve.

Neni 7

Emergjenca dhe shpëtimi

1. Çdo subjekt që kryen punime nëntokësore, ku vërtetohet prania e gazit metan apo gazeve të tjera shpërthyese apo ekzistojnë mundësitë e shfaqjes së tyre, siguron e garanton organizimin dhe funksionimin e skuadrës për emergjencë dhe shpëtim.
2. Për subjektet e pikës 1 dhe subjektet e tjera që kryejnë punime në nëntokë, në miniera apo ndërtim të punimeve nëntokësore të veprave hidroenergjetike, rregullat për organizimin dhe funksionimin e emergjencave dhe shpëtim rregullat për organizimin dhe funksionimin e emergjencave dhe shpëtimit, përcaktohen sipas rregullave të miratuara me Vendim të Këshillit të Ministrave.
3. Çdo subjekt që kryen punime nëntokësore është i detyruar të përgatisë dokumentin për planizimin dhe përballimin e emergjencave nëntokësore, ku pasqyrohet në mënyrë të hollësishme, parashikimi, masat parandaluese dhe burimet njerëzore e materiale për të përballuar rastin dhe shpëtimin e njerëzve.
4. Të gjithë punonjësit e nëntokës pajisen me mjete mbrojtëse e pajisje vetëshpëtimi individuale.

Neni 8

Kujdesi shëndetësor

1. Subjektet, para marrjes në punë të punonjësve duhet të kryejnë kontrollet e nevojshme shëndetësore të tyre dhe të sigurohen për marrjen e raporteve mjekësore të detyrueshme, në bazë të legjislacionit në fuqi.
2. Subjektet janë të detyruara të kryejnë së paku një herë në gjashtë muaj, kontrollin mjekësor të punonjësve që punojnë nëntokë.
3. Pranë çdo objekti minerar apo punimi nëntokësor, organizohet dhe funksionon shërbimi për dhënien e ndihmës së parë dhe të shpejtë.

Neni 9

Sinjalizimi dhe komunikimi

1. Subjekti merr masat e nevojshme për të siguruar e garantuar sistemin dhe pajisjet e sinjalizimit, të dallueshme qartë për çdo vend pune që paraqet rrezik për jetën dhe shëndetin e punonjësve, si dhe për të parandaluar apo mënjeluar hyrjen e personave të tjerë në sipërfaqen e lejuar të veprimtarisë së tij apo punimet që kryhen në veprën e tij nëntokësore.
2. Subjekti siguron dhe garanton funksionimin e sistemit të komunikimit të çdo niveli drejtimi me punonjësit në vendin e punës, si në kushte normale, ashtu edhe në raste për të përballuar e shmangur rreziqe apo për të realizuar ndërhyrje të menjëhershme në raste emergjencash e fatkeqësish.

KREU III

ZHVILLIMI I PUNIMEVE NË OBJEKT

Neni 10

Zhvillimi i punimeve

1. Subjektet zhvillojnë punime në rastet kur:
 - a) Ka projekte teknike e pasaporta teknologjike të miratuara për punimet dhe punët që do të kryejnë.
 - b) Plotësojnë kërkesat e parashikuara në rregulloret e sigurimit teknik e të mbrojtjes në punë dhe sigurojnë normat për ruajtjen dhe mbrojtjen e mjedisit.
 - c) Janë marrë masa që punimet në miniera, punimet nëntokesore në veprat hidroenergjetike, makineritë, pajisjet dhe lënda plasëse, të mirëmbahen në një nivel të tillë që të plotësojnë kërkesat esigurisë në punë.
 - ç) Zotëruesi i lejes minerare zbaton kërkesat e përcaktuara në projektin e miratuar tekniko-teknologjik.

Neni 11

Informimi i punonjësve

1. Subjektet që kryejnë veprimtari minerare dhe punime nëntokësore në veprat hidroenergjetike, marrin masa që punonjësit të përvetësojnë të dhënat dhe instruksionet e duhura për përdorimin e makinerive, të pajisjeve, të lëndës plasëse dhe të materialeve që ka në përdorim.
2. Të dhënat dhe instruksionet e përdorimit të makinerive, të pajisjeve dhe të lëndës plasëse duhet të përmbajnë informacione për sigurinë dhe shëndetin në punë.

Neni 12

Formimi i punonjësve

1. Subjektet që kryejnë veprimtari minerare dhe punime nëntokësore në veprat hidroenergjetike, marrin masat e nevojshme që:

- a) Punonjësit e ngarkuar për përdorimin e makinerive, të pajisjeve dhe të lëndës plasëse, të kenë formimin e mjaftueshëm për rreziqet që përmban përdorimi i tyre.
- b) Punonjësit e ngarkuar me riparimet dhe mirëmbajtjen, të kenë kualifikimin dhe formimin e duhur për kryerjen e këtyre detyrave.
- c) Punonjësit që kryejnë punë me lëndë plasëse dhe ata të skuadrave për emergjenca dhe shpëtim në subjekte, të testohen, vlerësohen dhe të pajisen me dëshmi çdo 5 vjet, nga komisionet teknike të ngritura në AKSEM.

Neni 13

Kqyrja e avarive

1. Për çdo rast aksidenti ose avarie të rëndë në minierë, në karrierë apo punim nëntokësor në veprat hidroenergjetike, subjekti duhet të njoftojë menjëherë AKSEM dhe çdo institucion tjetër në përputje me legjislacionin në fuqi.
2. AKSEM shqyrton aksidentet dhe avaritë që ndodhin gjatë veprimtarisë dhe përcakton shkaqet dhe përgjegjësitë, si dhe masat që duhen marrë për përmirësimin e gjendjes.
3. Zotëruesi i lejes minerare dhe subjekti që kryen punime nëntokësore në veprat hidroenergjetike, është i detyruar t'i japë inspektorit që shqyrton aksidentin ose avarinë, çdo të dhënë që ka lidhje me të.

KREU IV

AUTORITETI KOMBËTAR PËR SIGURINË DHE EMERGJENCAT NË MINIERA (AKSEM)

Neni 14

Autoriteti Kombëtar për Sigurinë dhe Emergjencat në Miniera

Autoriteti Kombëtar për Sigurinë dhe Emergjencat në Miniera (AKSEM) është person juridik publik, buxhetor, i organizuar në nivel qendror, i cili kryen veprimtari në fushën e sigurisë në punë, emergjencave dhe shpëtimin, në veprimtarinë minerare dhe punimeve nëntokësore të veprave hidroenergjetike.

Neni 15

Organizimi

1. AKSEM organizohet si Drejtori, në varësi të ministrit dhe e ka selinë e tij në Tiranë.
2. Organizimi dhe funksionimi i AKSEM rregullohet me vendim të Këshillit të Ministrave.
3. Marrëdhëniet e punës së Drejtorit të Përgjithshëm dhe nëpunësve të AKSEM, rregullohen në bazë të legjislacionit për nëpunësin civil.

Neni 16

Detyrat e AKSEM

1. Për përballimin e emergjencave në subjekte, AKSEM realizon këto detyra:
 - a) Për çdo situatë emergjente në veprimtari në miniera dhe punime nëntokësore në veprat hidroenergjetike, siguron e garanton gatishmërinë e plotë të personelit të pajisjeve dhe të mjeteve për të ndërhyrë e përballuar situatën e shpëtimit të jetës së njerëzve.
 - b) Kërkon nga çdo subjekt që kryen punime nëntokësore të parashikojë në praktikën e punës së tij, situatat emergjente dhe të ketë të përgatitur masat për përballimin e tyre, një kopje e të cilave dorëzohet në AKSEM çdo vit dhe sa herë praktikon punë në nëntokë për herë të parë.
 - c) Inspekton, bashkëpunon, bashkëvepron e kryen stërvitje të përbashkët me personelin e emergjencave të subjekteve në kushtet konkrete të zhvillimit të punimeve apo në situata të improvizuara emergjence.
 - d) Monitoron dhe mbiqkyr minierat e mbyllura dhe jashte perdorimi.
2. Vlereson, mbyll dhe monitoron grykat e punimeve minerare ne minierat e braktisura
3. Regjistron çdo subjekt që kryen veprimtari minerare dhe në ndërtimin e punimeve nëntokësore në veprat hidroenergjetike.
4. Vlerëson aftësitë teknike dhe profesionale të çdo personi fizik, që kërkon të përdorë e të kryejë punë me lëndë plasëse në subjekte apo të punojë si specialist për emergjenca dhe shpëtim.
5. Regjistron rastet e emergjencave dhe të aksidenteve të rënda me rrezik apo humbje jete.
6. Kryen analizat dhe verifikon rezistencën në tërheqje të litarëve të çelikut, që përdoren në impjantet ngritëse vertikale e të pjerrëta të transportit në subjekte.
7. Verifikon e vlerëson territorin e vend-ndërtimit të depove për magazinimin e lëndëve plasëse të subjekteve, si dhe miraton projektin e ndërtimit të këtyre depove.
8. Kryen vlerësimin e projekteve teknike, me qëllim pajisjen e subjekteve me autorizimin e përdorimit civil të lëndëve plasëse.

9. Çdo detyrë tjetër të përcaktuar nga legjislacioni në fuqi.

Neni 17

Të drejtat e AKSEM

1. Inspektorët e AKSEM kanë të drejtë të hyjnë, sipas programit të inspektimit të miratuar, në çdo kohë në territorin dhe vendet e punës, të subjekteve që kryejnë punë në veprimtarinë minerare dhe punime nëntokësore të veprave hidroenergjetike.
2. Në zbatim të programit dhe objektit të inspektimit, inspektorët e AKSEM kanë të drejtë të kërkojnë dhe të marrin një kopje të dokumenteve administrative e teknike të veprimtarisë së subjektit.
3. Inspektorët dhe personeli i emergjencave të AKSEM kërkojnë mbështetjen dhe ndërhyrjen e forcave të rendit kur:
 - a) pengohen dhe cenohen gjatë kryerjes së detyrës;
 - b) nuk zbatohet urdhri i ndalimit dhe ndërprerja e punës në rastet me rrezik serioz për jetën e njerëzve;
 - c) kur nuk lejohen të hyjnë në hapësirat e punës së subjekteve.

Neni 18

Inspektimi i subjekteve nga AKSEM

1. AKSEM kryen inspektime në subjekte private dhe publike, vendase dhe të huaja, që ushtrojnë veprimtari minerare dhe punime nëntokësore në veprat hidroenergjetike, në territorin e Republikës së Shqipërisë, në përputhje me këtë ligj dhe me ligjin nr. 10433, datë 16.06 2011 "Për inspektimin në Republikën e Shqipërisë".
2. Veprimtaritë minerare, punimet nëntokësore në veprat hidroenergjetike u nënshtrohen inspektimeve të programuara të AKSEM, në përputhje me ligjin nr. 10433, datë 16.06 2011 "Për inspektimin në Republikën e Shqipërisë".
3. Minierat dhe punimet nëntokësore të veprave hidroenergjetike u nënshtrohen inspektimeve teknike jashtë programit të AKSEM në çdo kohë, kur paraqiten rrethana të veçanta që lidhen me rreziqe për jetën e njerëzve, avari ose aksidente.

Neni 19

Vlerësimi i subjekteve nga AKSEM

1. AKSEM kryen inspektime në subjektet që ushtrojnë veprimtari minerare dhe punime nëntokësore në veprat hidroenergjetike, ku vlerëson nëse:
 - a) Ushtrimi i aktivitetit minierar apo punimet nëntokësore në veprat hidroenergjetike kryhen në përputhje me kërkesat e këtij ligji dhe legjislacionit në fuqi.

- b) Eshtë përgatitur dokumentacioni teknik i nevojshëm për ushtrimin e sigurt të aktivitetit minerar apo punimet nëntokësore në veprat hidroenergjetike.
- c) Janë marrë masat e nevojshme për kujdesin shëndetësor të punëmarrësve, në përputhje me legjislacionin dhe aktet teknike në fuqi.

Neni 20

Masat urgjente

1. Kur Inspektori i AKSEM-it konstaton se një minierë ose punim nëntokësor në veprat hidroenergjetike rrezikon sigurinë e njerëzve dhe të mjedisit, me vendim të ndërmjetëm, sipas nevojave të rastit, merr masa urgjente, në përputhje me ligjin nr. 10433, date 16.06.2011 "Për inspektimin në Republikën e Shqipërisë".
2. Kundër vendimit që vendos masa urgjente mund të bëhet ankim i veçantë në përputhje me ligjin për inspektimin.

Neni 21

Konflikti i interesave

1. Punonjësve të AKSEM u ndalohe të kenë interesa të drejtpërdrejta ose të tërthorta me subjektet ku ato ushtrojnë kontroll.
2. Punonjësit e AKSEM kanë detyrim të përmbushin çdo kërkesë tjetër sipas parashikimeve të ligjit nr. 9367, datë 07.04.2005 "Për parandalimin e konfliktit të interesave në ushtrimin e funksioneve publike", i ndryshuar.

Neni 22

Burimet financiare

1. Burimet financiare të AKSEM janë:
 - a) Buxheti i Shtetit;
 - b) Të ardhurat me destinacion, që realizohen nga shërbimet për të tretët.
2. AKSEM realizon të ardhura nga shërbimet që kryejnë për subjektet private ose publike nga:
 - a) Pagesa e tarifave për lëshimin e dëshmimeve dhe dublikatave për zjarrmëtarët dhe shpëtuesit e subjekteve;
 - b) Pagesa e tarifave për realizimin e provave e analizave të rezistencës në tërheqje të litarëve të çelikut të impjanteve ngritëse të subjekteve;
 - c) Pagesa e tarifave për regjistrimin fillestar të subjekteve;
 - d) Pagesa e tarifave për monitorim, verifikim e inspektim, të kërkuara nga vetë subjekti.

3. Tarifat për këto të ardhura caktohen me udhëzim të përbashkët nga Ministria e Financave dhe Ministria që mbulon veprimtarinë minerare.

KREU V

DISPOZITA TË FUNDIT

Neni 23

Kundërvajtjet administrative

1. Shkeljet e mëposhtme, kur nuk përbejnë veprë penale, përbejnë kundërvajtje administrative dhe dënohen me gjobë nga ana e AKSEM:

- a. Kur subjekti ka kryer shkelje të pikës 1 dhe 2, të nenit 6, vendoset gjobë 150 mijë lekë.
- b. Kur subjekti nuk njofton në AKSEM, kur ka ndodhur aksident ose avari e rëndë në minierë, në karrierë apo punim nëntokësor në veprat hidroenergjetike, vendoset gjobë 100 mijë lekë.
- c. Kur subjekti nuk ka zbatuar detyrat e lëna dhe të përcaktuara në aktet e inspektimit të mëparshëm të AKSEM, vendoset gjobë 200 mijë lekë.
- ç. Në rastet kur shkelen pikat e nenit 7, subjekti ndëshkohet me gjobë 200 mijë lekë.
- d. Kur vihen re dhe konstatohen: mungesë e planit vjetor të zhvillimit të punimeve apo punohet jashtë këtij plani, nuk ka sigurim jete për të gjithë punonjësit, urdhrat e punës dhe udhëzimet teknike nuk respektojnë normat teknike të vendosura, mungojnë pasaportat teknologjike për procese të ndryshme të praktikës së punës, nuk plotësohet sipas rregullave teknike të sigurisë planimetria e punës së objektit, masa e gjobës është nga 300 mijë lekë.
- dh. Kur inspektori ose grupi i inspektorëve të AKSEM kundërshtohet, nuk pranohet apo pengohet të kryejë detyrën në zbatim të dispozitave të kreut të katërt të këtij ligji, gjoba është 400 mijë lekë.

2. Shqyrtimi i kundërvajtjeve administrative, procesi i ankimit dhe ekzekutimi i vendimeve të AKSEM, bëhet në përputhje me ligjin nr. 10279, datë 20.05.2010 “Për kundërvajtjet administrative”.

3. Të ardhurat nga masat administrative të aplikuara sipas pikës 1 të këtij neni, derdhen tërësisht në buxhetin e shtetit.

Neni 24

Pezullimi i punimeve

1. Në rastet e përfundimit të inspektimeve të programuara apo inspektimeve jashtë programit, inspektori ose grupi i inspektorëve të AKSEM, kur vlerëson prezencë të rreziqeve serioze për

jetën e punonjësve, shkelje të rënda të ligjit dhe rregullave teknike për sigurinë në punë, pezullon kryerjen e punimeve në objekt.

2. Pezullimi i punimeve mund të jetë tërësor ose i pjesshëm për vende e fronte pune të veçanta, i përkohshëm ose i përhershëm.
3. Pezullimi për ndalim të punimeve pasqyrohet në procesverbal dhe i bëhet i ditur menjëherë përfaqësuesit të subjektit. Në procesverbal pasqyrohen qartë hapësira, koha e pezullimit dhe detyrat konkrete.
4. Në rastet kur merret vendim për pezullim tërësor të punimeve, pavarësisht nga koha, përgatitet relacioni me problematikën e subjektit dhe i dërgohet Ministrit.
5. Kur subjekti nuk respekton vendimin e pezullimit të punimeve të inspektorëve, AKSEM i propozon Ministrin revokimin e lejes së subjektit, si dhe njofton organet e policisë së shtetit e prokurorisë në territorin ku kryen aktivitet subjektit.

Neni 25

E drejta e subjekteve për ankimim

1. Kundër vendimit me gjobë, të vendosur nga inspektorët minerarë të AKSEM, subjekti ka të drejtën e ankimimit me shkrim pranë komisionit të shqyrtimit të gjobave në AKSEM, nw pwrputhje me Kodin e Procedurave Administrative.
2. Komisioni i shqyrtimit të gjobave në AKSEM, i miratuar sipas rregullave dhe procedurave të përcaktuara me udhëzim të ministrit, shqyrton ankimimin, merr vendimin dhe njofton subjektin për vendimin e marrë brenda 15 ditëve nga data e regjistrimit të ankimimit.
3. Subjektet kanë të drejtën që kundër vendimit të Komisionit të Shqyrtimit të Gjobave, të bëjnë padi për shqyrtim të mosmarrëveshjes administrative në Gjykatën Administrative të Shkallës së Parë, Tiranë.
4. Kundër vendimit për pezullim apo ndalim të punimeve në mënyrë tërësore, subjekti ka të drejtë të bëjë ankim tek Ministri, brenda 10 ditëve nga data e marrjes së vendimit të inspektorëve të AKSEM.
5. Brenda 15 ditëve nga data efektive e ankimimit, Ministri shqyrton ankimimin dhe ngre grup pune për rivlerësim të problematikës dhe merr vendim përfundimtar.
6. Subjektet kanë të drejtë që kundër vendimit të Ministrit, të bëjnë padi për shqyrtim të mosmarrëveshjes administrative në Gjykatën Administrative të Shkallës së Parë, sipas legjislacionit në fuqi.

Neni 26

Shfuqizime

1. Ligji nr. 8741, datë 15.2.2001 "Për sigurinë në punë në veprimtarinë minerare" dhe çdo dispozitë tjetër që bie ndesh me këtë ligj shfuqizohet.
2. Aktet nënligjore, që rregullojnë veprimtarinë e sigurisë në punë, emergjencave dhe shpëtimit në veprimtarinë mineare apo punimeve hidroenergjetike, të miratuara përpara hyrjes në fuqi të këtij ligji, do të zbatohen për aq sa nuk bien në kundërshtim me këtë ligj, deri në rishikimin e tyre dhe daljen e akteve të reja, në përputhje me kërkesat dhe afatet e vendosura në këtë ligj.

Neni 27

Ndryshim emërtimi

Në çdo akt ligjor apo nënligjor, apo marrëdhënie juridike të krijuar, togfjalëshi “Reparti i Inspektim Shpëtim Miniera”, do zëvendësohet me togfjalëshin “Autoriteti Kombëtar për Sigurinë dhe Emergjencat në Miniera”. Titullari dhe ish-punonjësit e Repartit të Inspektim Shpëtim Miniera, konsiderohen të emëruar sipas legjislacionit në fuqi.

Neni 28

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

K R Y E T A R I

ILIR META